

HE TUHINGA TAUTOHE

Te whakamāramatanga:

Ka whakaahua atu i tētahi tirohanga, i tētahi whakawai, ko te hua ko te tautohe.

Te pūtake:

Ko te tautohe, ko te whakawhere i te kaipānui kia kite ia i tāu tirohanga mō tētahi take, me te whakaae hoki ki tāu tirohanga.

Ngā momo tautohe:

E rua ngā momo tuhinga tautohe ko te tautohe whaiaro me te **tautohe whānui**.

Te tapanga

Te whakatakotoranga take

Te tautohenga

Te whakakapinga

Te Kākahu ā-Kura

Tokohia ngā ākonga e haere ana ki ngā kura o te motu ia wiki, ia wiki? Tokohia hoki ngā ākonga e tū whakahīhī ana mō ō rātou kākahu, e tū whakamā ana rānei mō ō rātou kākahu? Ki tōku nei whakapae me mau e ngā ākonga ā-kura katoa o te motu te kākahu ā-kura, ahakoa ko wai rātou, ahakoa nō hea rātou.

Ko te take tuatahi, he mea nui te tohu nō te kaitui kākahu, pērā i a Ripcurl, Billabong, me Nike ki ngā ākonga. E hiahiatia ana ngā kākahu kua tohungia pērātia e te nuinga o ngā ākonga. Ki te kore ngā ākonga e mau kākahu ā-kura, ka tū te whakataetae kākahu i waenganui i a rātou. I ētahi wā he nui te raruraru, ā, ka tāhaengia ngā hū me ngā kākahu.

Ko te take tuarua, mēnā kāore he kākahu ā-kura, ka whakawehea ngā ākonga i runga i ngā momo kākahu. Nō reira, ko ngā kākahu ā-kura he mea hāpai i te whakakotahitanga o te kura.

Āpiti atu ki ērā take, he taumaha rawa te utu o ngā kākahu kua tohungia e ngā kamupene nui. Mā te kaha o te utu, ka pakaru te pūkoro o ngā mātua. E ai ki tētahi kaitohutohu mō te āhua tāngata (tirohia te pae tukutuku 'Te Tautohetohe mō te Kākahu ā-kura'), ahakoa he nui te utu mō ngā kākahu ā-kura, he māmā ake tērā i te hoko kākahu maha i runga i ngā hiahia o ngā ākonga.

Heoti anō, me mau e ngā ākonga ā-kura o te motu te kākahu ā-kura, ahakoa ko wai rātou, ahakoa nō hea rātou. Hei aha? Hei hāpai i te rangimārie i waenganui i ngā ākonga, hei whakakotahi i te kura, hei āwhina hoki i ngā mātua.

Hei tautohu i te kaupapa o te tautohe.

Hei tāpae i te take me te tirohanga.

Ka whakamōhiohia te kaipānui ki ngā tohenga matua me ngā tohenga tautoko. Ka whakamahia ngā puna mātauranga hei rapu i ngā tohenga e tautokotia ana i tā te kaituhi tirohanga.

Ka whakatakoto anō i tā te kaituhi tirohanga, ka tuhi whakarāpopotonga, ka whakakapi.

Ngā āhuatanga reo

- Te reo tohu i te mahi a tētahi atu → Tokohia **ngā ākongā** e haere ana ... (para 1)
... e tū whakahihī ana mō ō **rātou** kākahu, ... (para 1)
... kua tohungia pērātia e te nuinga o **ngā ākongā**. (para 2)
... i waenganui i a **rātou**. (para 2)
..., ka pakaru te pūkoro o **ngā mātua**. (para 4)
..., hei āwhina hoki i **ngā mātua**. (para 5)
- Te reo raupapa → **Ko te take tuatahi**, ... (para 2)
Ko te take tuarua, ... (para 3)
Āpiti atu ki ērā take, ... (para 4)
- Te reo tūhono i te take me te pānga → **Ki te kore** ngā ākongā e mau kākahu ā-kura, ... (para 2)
..., **mēnā** kāore he kākahu ā-kura, ... (para 3)
- Te reo whakaputa whakaaro → **Ki tōku nei whakapae** me mau e ngā ākongā ā-kura katoa ... (para 1)
E ai ki tētahi kaitohutohu mō te āhua tāngata ... (para 4)
- Te reo whakakapi → **Heoti anō**, ... (para 5)

Ngā tohutoro

Benefits of School Uniforms. I tangohia i te 22/08/07, mai i http://kids.lovetoknow.com/wiki/Benefits_of_School_Uniforms

The School Uniform Debate: An Image Consultant Weighs In. I tangohia i te 22/08/07, mai i http://kids.lovetoknow.com/wiki/The_School_Uniform_Debate:_An_Image_Consultant_Weighs_In

For further information about Persuasive Writing see:

Aronui (2008). He Manu Tuhituhi. *He Tuhinga Tautohe: He Pukapuka Arataki i te Kaituhi*. pp. 31–49. Te Papa-i-oea: Aotearoa.

Aronui (2008). He Manu Tuhituhi. *He Kura Tuhituhi me He Manu Taketake: Te Pukapuka Aratohu mā te Kaiako*. “He Tuhinga Tautohe.” pp. 95–108. Te Papa-i-oea: Aotearoa.

He mea waihanga mō tētahi kaupapa a Te Tāhuhu o te Mātauranga.

Mana pupuri © Te Karauna 2011
Pūmau te mana.



Te Kāwanatanga o Aotearoa

